



22. Tschanteda dal cussagl cumünel in marcaldi, ils 20.11.2013 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Ines Barblan, Paolo Bernasconi

Absaints: Gian Fadri Largiadèr

Actuar: Duri Schwenninger

Tractandas:

1. Protocol
2. 0.205 Preventiv 2014, 1. lectüra
3. 0.211 Dumandas da fabrica
4. 6.200 Rumida da naiv vias laterelas/champestras, surdeda da lavur
5. 0.210 Decisiun cunvegna davart la collavuraziun e l'organisaziun da las gestiuns forestelas e las gruppas per lavuors cumünelas da las vschinaunchas da S-chanf e Zuoz
6. 1.500 Departamaint VBS Armasuisse, vendita caserna Pass Chaschauna a la vschinauncha da S-chanf, dumanda d'interess
7. 0.212 Tscherna giarsun bos-cher
8. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 6.11.2013 vain approvu unanimamaing.

184 0.205 Rendaquint/planisaziun da finanzas Preventiv 2014, 1. lectüra

Il cussagl fo üna lectüra dal preventiv 2014. Cun sortidas da fr. 8'892'700.00 ed entredgias da fr. 8'743'135.00 serra il preventiv 2014 cun üna perdita da fr. 149'565.00. L'an chi vain es previs da fer investiziuns brüttas ill'otezza da fr. 3'350'000.00 cun entredgias in fuorma da subvenziuns e contribuziuns d'arduond fr. 375'000.00. Il cussagl decida unanimamaing da suottametter il preventiv 2014 a la prosma radunanza cumünela cun la proposta d'accepter quel.

185 9.100 Pè d'impostas Pé d'impostas per l'an 2014

As basand sül rendaquint da l'an da gestiun 2012 scu eir resguardand las investiziuns da l'an chi vain, decid'il cussagl unanimamaing da propuoner a la radunanza cumünela da

lascher il pè da l'imposta cumünela per l'an 2014 sün 75% da l'imposta chantunela simpla.

**186 6.200 Vias e piazzas cumünelas
Rumida da naiv vias laterelas/champestras, surdeda da lavur**

Il cussagl ho publicho la rumida da naiv 2013/2014 per las vias laterelas/champestras illas chaschas nairas ed ho invido a differents chi spordschan quella lavur, d'inoltrer offertas. La lavur es gnida scritta our cun 6 differents targets e'ls offerents haun pudieu inoltrer l'offerta per mincha traget. In seguit sun entredas 3 offertas. Il cussagl decida unanimamaing da surder seguaintamaing la rumida da naiv da las vias laterelas/champestras: sectur 1 Punt da Crap - zardin forestel Flin e sectur 4 Pro d'Isla Dvart - Susauna a Peter Angelini per fr. 210.00 per üna rumida; sectur 2 Somvih – Palüds - Foura Chagnöls - Straglia Bouvs - Tschessa Granda, sectur 5 Arudè - Rudè e sectur 6 Rudè – Drusatsch – Plaz -Islas a la firma Angelini SA pel predsch da fr. 700.00 per üna rumida e'l sectur 3 Tschessa Granda - God God - Ospiz Chapella a Gian Andrea Bott pel predsch da fr. 250.00 per üna rumida. Gian Andrea Bott s'ho absanto per quista tractanda.

**187 0.210 Contrats e cuvegna
Decisiun cuvegna davart la collavuraziun e l'organisaziun da las gestiuns forestelas e las gruppas per lavuors cumünelas da las vschinaunchas da S-chanf e Zuoz**

L'an passo s'ho publicho la piazza per ün respunsabel per l'infrastructura e l'uffizi da fabrica. Dischplaschaivelmaing nu s'ho quella vouta chatto üna persuna adatteda. Las lavuors da l'uffizi da fabrica s'ho pudieu surder a la firma Geo Grischa. Reguard las lavuors da survagliaunza da l'infrastructura chi cuntegna il mantegnimaint da las vias, il mantegnimaint da las lingias d'ova potabla e chanalizaziun s'ho gieu il cumanzamaint da quist an prüms discuors cul cussagl cumünel da Zuoz per ün'eventuela collavuraziun. In seguit s'ho tschernieu üna cumischiun chi vaiva l'incumbenza d'elavurer üna cuvegna per la collavuraziun. Zieva püssas tschantedas es uoss'avauntmaun üna proposta chi regla la collavuraziun e l'organisaziun da la gestiun forestela e da la gruppa per lavuors cumünelas. Il silvicultur da S-chanf es previs scu mneder dals 2 uffizis forestels ed impü dess quel mner inavaunt scu fin co la resgia e la deponia regiunela Bos-chetta Plauna. Il silvicultur da Zuoz es previs scu mneder d'infrastructuras da las 2 vschinaunchas. Impü es previs üna cumischiun da coordinaziun chi's cumpuona our dals 2 presidents cumünels e'ls 2 chanzlists chi garantischa la direcziun operativa e la collavuraziun economica traunter la gestiun dal servezzan tecnic e la gestiun forestela. Minch'eivna dess avoir lö üna tschandeda da coordinaziun traunter la cumischiun e'ls mneders dals 2 sectuors. Ils depütos dals 2 cussagls cumünels fuorman la cumischiun accumpagnatorica strategica. Il cussagl fo üna lectüra da la cuvegna e decida unanimamaing d'accepter la cuvegna cun üna düreda maximela da 4 ans chi vo in vigur ils 01.01.2014.

**188 1.500 Militer
Departamaint VBS Armasuisse, vendita caserna Pass
Chaschauna a la vschinauncha da S-chanf, dumanda d'interess**

Il militer ho suottamiss al cussagl üna dumanda, scha la vschinauncha da S-chanf füss interesseda da surpiglier ils edifizis istorics da cumbat e da direcziun sün noss territori cumünel. Per granda part as tratta que da refügis sotterrauns in Val Susauna, in Varusch ed in vicinanza da l'alp Vaüglia. Scha l'interess es avauntmaun, gniss eir in dumanda la caserna sül Pass Chaschauna. L'ultim edifizis però be, scha'ls edifizis sotterrauns vegnan eir surpiglios. Tenor ils respunsabels dal departamaint paun ils edifizis manzunos be gnir surpiglios da las vschinaunchas pertuchedas u dal chantun, ma d'üngün privat. Uschigliö dession quels rester in proprietad dal stedi. Il predsch da cumprita nun es auncha defino, prubabel però per ün predsch simbolic. Zieva cuorta discussiun decid'il cussagl

unanimamaing da tratter inavaunt cul departamaint VBS per surpiglier ils edifizis istorics da cumbat e da direcziun sün noss territori cumünel.

189 0.212 Persunel
Tscherna giarsun bos-cher

Sün la publicaziun da la piazza libra per ün giarsun bos-cher sun entredas 6 annunzchas. Zieva chi haun gieu lö ils giarsunedis da prouva scu eir ils discuors da preschantaziun culs interessos propuon'il silvicultur ün candidat. Il cussagl tscherna unanimamaing, sün proposta dal silvicultur, a Marius Pietsch da Wallbach scu nouv giarsun bos-cher. El cumainza il giarsunedi al principi d'avuost 2014.

190 9.999 Varia

Da quista tractanda nu vain fat adöver.

A las 22.00 vain la tschanteda alveda.

In buna fè

L'actuar:
D. Schwenninger